

Aunke e lo continua otro año

Comision di parokia di Dakota lo evalua celebracion di Corpus Christi



ORANJESTAD - Na final di e celebracion di Corpus Christi diadomingo ultimo, pader Daniel Szpila di parokia Birgen di Fatima di Dakota a declara na Bon Dia Aruba cu ainda e tin cu evalua cu e comision con e celebracion a bay e año aki.

E biaha aki e religioso a mira cu lamentablemente e partic-

ipacion di pueblo tabata menos cu año pasa. “E ta preocupa mi un poco”, el a bisa. Pero a pesar di e situacion aki, pader Daniel a laga sa cu nan lo continua pa e celebracion di Corpus Christi por crece.

“E ta un sueño, e ta un anhelo pa e por bira un celebracion nacional”, el a bisa. El a gradici e presencia di

diferente sacerdote y parokianonan rond di Aruba. “Esa-ki ta un señal cu ta bin pa bisa nos: ‘sigui pasobra poco poco e pueblo lo contesta’, y esey ta nos speransa tambe”, el a bisa.

P’esey pader Daniel a señala cu sinembargo nan lo persisti ainda pa conscientisa pueblo di importancia di manifesta nos fe publicamente. E ta kere cu mester bin cu mas conscientisacion y talbes un palabra cu e no ta gusta uza, esta “propaganda”, pa pueblo prepara su mes pa proximo año.

Di otro banda Pader Daniel Szpila kende ayera a celebra su 30 aniversario di bida religioso como pastoor, a declara na Bon Dia Aruba cu celebracion di Corpus Christi ta un solemnidad religioso hopi importante.

E celebracion aki a keda institui mas cu 800 año pasa. Kiermen durante 8 siglo largo tur año Iglesia Catolico rond mundo a celebra esey di un manera publico saliendo cu Santísimo Sacramento, kiermen cu Hesus presente den Eucaristia riba cayanan di pueblo.

Pader Jairo di parokia



Cristo Rey

Parokia Cristo Rey di Brasil a uni na e celebracion di Fiesta di Corpus Christi. Intencion ta cu e fecha aki lo por bira un fiesta religioso nacional. E tradicion religioso aki a keda interumpi pa varios año, pero fei año pasa parokia di Dakota a bin cun’e bek.

Pader Jairo Maduro di e parokia menciona a declara na Bon Dia Aruba cu e celebracion aki ta un bon iniciativa di pastoor Daniel Szpila, y nan a join e iniciativa aki hunto cu otro parokianan rond Aruba. Nan a bin cu nan bus y nan parokianonan di Brasil pa Playa.

Pader Jairo a laga sa cu e ta un “iniciativa grandioso” pa otro año tur parokia por bin hunto y e pueblo di Dios completo, hunto cu nos autoridadnan

competente y tur hende cu tin un funcion importante pa busca forsa di ariba di Señor. “Cos asina nos mester duna balor. Mi ta contento cu pastoor Daniel su iniciativa y nos coleganan sacerdote, tur a forma parti di dje”, el a bisa.

“Nos kier pa Señor ta e centro di nos bida aki na Aruba”, asina e religioso Arubiano a bisa. E ta haya importante pa haci e “manifestacion aki” pa mustra nos fe den un Cristo bibo, y un Cristo cu no a bay fei di nos, sino cu a keda cerca nos den Eucaristia cu nos ta ricibi cada diadomingo.

E ta considera importante pa nos pueblo por realisa e tipo di manifestacion aki di Fe, pasobra “Señor si ta e solucion pa tur nos problem-
anan cu nos ta biba cada dia akinan” □